

In memoriam Burny Every

ORANJESTAD - SIMAR y mundo di enseñansa ta di luto : un bon colega, un miembro fiel, un activista comprometi, y un persona cu conviccionnan fuerte a bai sosega den Señor. Burny a bira miembro di SIMAR ora el a cuminsa traha como maestra di drama den enseñansa. Di dj'e nos a bin ta comprende e importancia di drama den curiculo di scol, pa un desaroyo equilibra di mucha y el'a proba den practica, cu esaki ta realisabel. E tabata un berdadero pionero riba e tereno aki. Nos ta recorda Burny tambe como un actris talentoso. Como miembro di sindicato SIMAR e tabata un ehempel pa nos tur: semper e tabata presente na reunionnan y otro actividadnan, participando activamente y vociferando su opinion cu conviccion. SIMAR a pasa den diferente epoca dificil y semper Burny tabata presente pa yuda busca solucion. Den añ 1985, el a sera cabez cu 10 otro miembro, pa tuma rienda di nos sindicato; nan a forma un directiva amplio. Esaki a sosode durante un di e periodonan di mas turbulento den historia di Aruba. Lago a sera su portanan y a bandona Aruba. Poblacion di Aruba a cai dramaticamente, pa motibo cu hopi di nos paisanonan a emigra pa busca un mihor porvenir. Gobierno a introduci medidanan di austeridad drastico. Pa falta di suficiente alumno a cuminsa sera scol y maestronan mester a comparti trabou (deeltijdbanen) y hopi maestro hoben a bandona Aruba en busca di trabou. Como presidente di SIMAR, Burny a sa di guia e maestronan den e tempo dificil aki. Na comienso di 1985 cu su megafon el'a dirigi hunto cu Adelita Tromp di FTA, e marcha di sindicatonan di mas grandi. Otronotapositivota, cu el a parana cu na di inicio di e proces di inovacionnan den enseñansa, cu ta continuando te dia di awe. SIMAR y mundo di enseñansa ta di luto, pasobra nos a perde un di nos baluartenan. Algun di nos tabata sa, cu Burny ta malo, pero pa mayoria di nos su morto a bin inespera. SIMAR lo recorda Burny como un maestra y colega dedica, un promotor di drama y di arte en general den enseñansa, y como un activista sindical comprometi. Burny, sosega na paz y te despues

Celebracion di instalacion di Enid Croes-Marugg como Presidente di Quota International



ORANJESTAD – E siman aki Quota International Aruba a tene un 'civic reception' pa asina celebra oficialmente e instalacion di Enid Croes-Marugg como Presidente di Quota International. E instalacion a tuma luga na Australia, durante e Convencion Internacional di Quota, y a wordo celebra na Cas di Cultura. Entre e invitadonan a figura Gobernador Fredis Refunjol, Presidente di Parlamento Mervin Wyatt-Ras, varios parlamentario y comerciantenan local. Enid tabata compaña pa su casa Robert Croes y yiunan Robert Croes II y Marielsa Croes.



E anochi a conta cu un presentacion chikito, unda cu Presidente di Quota International Aruba a presenta Enid cu algun regalito y un bunita cuadro di su instalacion como Presidente Internacional na Australia. Durante e celebracion, a parti e edicion special cu Aruba Today/Bon Dia Aruba a dedica na Enid Croes-Marugg y Quota International of Aruba pa asina tur hende por a conoce Enid y e club di servicio un tiki mas di serca.

Bon Dia Aruba ta desea Enid Croes-Marugg exito y forsa den su funcion nobo como Presidente di Quota International.





Mundo Infancia

Tur Diasabra 8:00 - 10:00

Cu Tanchi Esmé & Tio G

Wega - Musica - Informashon Educativo - Prem

Tel: 5839696 - 5829696